

晝見夜犯熒惑○鵠鷗鳴于移御所○甲戌流星出柳星南大
如鉞光芒如火○倭船七艘至西北面宣州請降遣降倭仇陸
藤昆招諭之仍賜陸鞍馬衣冠初倭寇侵掠大明沿海之地以
及我豐海道西北面等處及聞其六州牧高義弘起兵擊殲三
島之為賊者恐禍及已遂乞降○右政丞金士衡稱疾上箋辭
上謂都承旨李文和曰且留此箋以俟其病之差劇○丁丑
太白晝見○流前政堂文學郭樞于平州樞謂前將軍田興為
家奴勒令役使興訴于憲司憲司辨其宗派良籍明甚劾樞壓良
之罪上以樞靖安公翁主之族父宥之只流平州農莊○辛巳
赤祲徧于四方○壬午冬至大雨免朝賀○羣鴉集于佛恩寺
松○癸未太白晝見○遣都承旨李文和諭金士衡視事○上
率百官幸長湍以迎太上王之還太上王發漢京將還舊
都上欲幸長湍只令諸節制使及甲士隨駕門下府上言人
主動靜不可斯須廢禮願殿下率百官備儀仗以迎太上
王垂法後世從之○丙戌木冰鵬鳥鳴于壽昌宮北苑○丁